

Im Café

Neili wor i im Schädla da
wart auf mein Fährer schee
Wos machd mer denn dô so allaa
I bin hald ins Kaffee.
Do sicht und herd mer allerhand,
i habs a weng aufgschrie'm,
wos all die Leid aus Schadd und Land
im Kaffee so hãm drie'm.

Auf der annern Seid'n hockt a äldrer Mõõ
den had is Reißen plöcht,
etz wor er hald beim Dokder dô
der had zu ihm glei gsöchd:
"Drink jed'n Dooch sechs Schnäbsli aus,
na werds ball besser sei".
Etz hat er dengt, des is ned schlechd,
dã fäng i o etz glei.

Zwaa junga Frauen mit an Kind,
die sitzn schräg vo mir,
glaab net, daß die vo Neischdad sinn
die hom sie droffen hier.
Ja, sechd die aa, wie geds dir denn ?
bist aa vill digger wor'n.
Noja sechd dã die anner drauf,
mei Moo will hald wos vorn
und hinden will er a wos gschbiern
etz tu in hald sein Will'n
er is hald gorned für die Dürr'n
sein Wunsch muß i erfilln.
"Ja sowos, giãs denn sowos aa,
i drau mer böll nex essen,
denn meinä , ja's is wergli wöhr
is auf schlank ganz versessen.

Wenn der etzerla seched, daß i heid
zwaaschdiggli Dordn ess
grieched i an Grach, o liewa Zeid,
denn wo i ned vergess.
Da sechd der Glaa im Egg ganz laud,
"Mama i verrad di ned,
wennst mer no glei a Audo kaaf'sd,
na derfährts der Babba ned".
Naja mei Lauser, du sollsds hoom
ober hald mer blos is Maul.
Nached beschdelld se si glei nu a Schdigg
und worgds nei, wie a Gaul.

Floodd kummt a ganz jungs Berschla rei
am Börd a weng an Flaum.
Sei Augn die genna hi und her
der suucht beschtimmt sein Draum.
Die hind im Egg, die muß es sei
sei Gsicht ströhld wie a Schdern,
er sedzd si a glei nõ zu ihr
und hadds zum Fressen gern.
Er schmadzd si oo, des is a Schbass
do schaud mer ner gern hi
Am Bårdla is sei Flaum ^{sch} so nass
vo lauder Simbadie.

Zwaa Madli, so 13-14 Jöhr
schaua zu und kichern leis,
"a soo an mechet i fei ned,
des is beschdimmd a Breiß".
"Ach des sell will i görnet sog'n ,
der had hald so Maniern
i man , wenn i a G'leg'nheit hob,
weriſ selwer ausbrowiern.

Im Cafe -3-

Die Großmudder dord am Fensderdiesch
dringd's Kafeela mid Bedachd
sie babbeld leise vor si hie
mir is, als ob sie lachd.
Hob i mein Aldn ausg'schmiert heid,
hob gsocht i geh zum Dogder,
sunst kann i ned allaa fordgeh
hinter mein Rock dō hog'd er.

So sichd mer widder Liebe Leid
a jedēā had sei Brobleem
und a bissla Hamlichkeid
is ofd des halwe Leem.